

四庫全書

子部

欽定四庫全書

冊府元龜卷三百五十一 宋 王欽若等 撰

將帥部

立功第四

宋檀祇晉末為振武將軍隸振武大將軍劉道規追討  
桓玄每戰克捷江陵平定道規遣祇征滇沔亡命桓道  
兒張靖苻嗣等皆悉平之除龍驤將軍又破桓亮於長  
沙苻宏於湘東加寧朔將軍

劉敬宣晉末為輔國將軍晉陵太守元興中桓歆率氐賊楊秋寇歷陽敬宣與建威將軍諸葛長民大破歆於芍陂歆單騎走渡淮斬楊秋於練固而還又擊桓亮苻宏於湘中所在有功

傅弘之晉末為桂陽公劉義真西戎司馬寧朔將軍時畧陽太守徐師高反叛弘之討平之赫連勃勃偽太子瓌率衆三萬襲長安弘之又領騎五千於池陽大破之殺傷甚衆瓌又抄掠渭南弘之又於寡婦渡破瓌獲賊

三百掠七千餘口

蒯恩晉末以寧遠將軍領幢隨振武將軍劉道規西討  
虜桓仙容克偃月壘遂平江陵後從高祖伐廣固又有  
戰功盧循逼京邑恩戰于查浦賊退走與王仲德等追  
破循別將范宗民於南陵循既走還廣州恩又領千餘  
人隨劉藩追徐道覆於始興斬之遷龍驤將軍蘭陵太  
守

孫季高晉末為振武將軍盧循之難於石頭扞柵戍越

城查浦破賊於新亭高祖遣季高率衆三千汎海襲番禺初賊不以海道為防季高至東衝去城千餘里城內猶未知循守戰士猶有數千城池甚固季高先焚舟艦悉力登岸會天大霧四面陵城即日克拔循父擬長史孫建之司馬虞虓夫等輕舟奔始興即分遣振武將軍沈田子等討平始興南康臨賀始安嶺表諸郡循於左里奔走而衆力猶盛自嶺道還襲廣州季高拒戰二十餘日循乃破走所殺萬餘人

吉翰督梁南秦二州諸軍事元嘉三年仇池氐楊興平遣使歸順并兄弟為質翰遣始平太守龐詒據武興仇池大帥楊玄遣弟難當率衆拒詒又遣將強鹿皮向白水詔擊破難當等餘並退走

裴方明為龍驤將軍元嘉十九年氐賊楊難當寇盜不已太祖遣方明率禁兵五千討之方明至武興率太子積弩將軍劉康祖後軍參軍梁坦陳彌裴肅之安西參軍段叔文魯尚期始興王國常侍劉僧秀綏遠將軍馬

洗振武將軍王奐之等進次潭谷去臯蘭數里難當遣其建節將軍苻弘祖琰元等固守臯蘭鎮北將軍苻德義於外為遊軍難當子撫軍大將軍和衆兵繼其後方明進擊大破之於濁水斬弘祖並三千餘級遣康祖追之過臯蘭二十餘里又遣德義來戰康祖又大破之和退保脩城難當遣建忠將軍楊林振威將軍姚憲領二千騎就和方明又率諸將攻之和敗走追至赤亭難當席卷奔叛方明遣康祖直趣百項偽丞相楊萬壽等一

時歸降難當第三息虎先戍陰平難當既走虎逃竄民間生擒之送京都斬于建康市

沈慶之為建威將軍元嘉十九年率衆助征西司馬朱脩之討雍州蠻脩之以失律下獄慶之專軍進討大破緣沔諸蠻禽生口七千人進征湖陽又獲萬餘口後為廣陵王誕北中郎將中兵叅軍雍州蠻又為寇慶之隨誕入沔既至襄陽率中兵叅軍柳元景隨郡太守宗懋振威將軍劉顥司空叅軍魯尚期安北叅軍顧彬馬文恭



左軍中兵叅軍蕭景嗣前青州別駕崔日連安蠻叅軍  
劉雍之奮威將軍王景式等二萬餘人伐沔北諸山蠻  
宗慤自新安道入太洪山元景從均水據五水嶺文恭  
出蔡陽口取赤係塢景式繇延山下向赤圻坂日連尚  
期諸軍八道俱進慶之取五渠頓破塢以為衆軍節度  
前後伐蠻皆山下安營以迫之故蠻得據山為阻於矢  
石有用以是屢無功慶之乃會諸軍於茹丘山下謂衆  
曰今若緣山列旆以攻之則士馬必損去歲蠻田大稔

積粟重巖未有饑弊卒難禽翦今令諸軍各率所領以營于山上出其不意諸蠻必恐恐而乘之可不戰而獲也於是諸軍並斬山開道不與蠻戰鼓譟上山衝其腹心先據險要諸蠻震擾因其懼而圍之莫不奔潰自冬至春因糧蠻殺頃之南新郡蠻帥田彥生率部曲十封六千餘人反叛攻圍郡城慶之遣元景率五千人赴之軍未至郡已被破焚燒城內倉儲及廨舍蕩盡并驅畧降戶屯據白楊山元景追之至山下衆軍悉集圍山數

重宗慙率其所領先登衆軍齊力急攻之威震諸山羣蠻皆稽顙慶之引軍自茹丘山出檢城大破諸山斬首三千級虜生蠻二萬八千餘口降蠻二萬五千口牛馬七百餘頭米粟九萬餘斛隨王誕築納降受俘二城於白楚慶之復率衆軍討幸諸山大羊蠻緣險築重城施門櫓甚峻山多木石積以為礮立部曲建旌旗樹長帥鐵馬成羣慶之連營山中開一門相通又命諸軍各穿池於營內朝夕不外汲兼以防蠻之火頃之風甚蠻夜

下山人提一炬以燒營當多慢屋及草菴火至輒以池水灌滅諸軍多出弓弩夾射之蠻散走慶之令諸軍斬山開路攻之而山高路險暑雨方盛乃置東岷蜀山宜民西砦黃徽上凌六戍而還蠻被圍守日久並饑乏自後稍出歸降慶之前後所獲蠻並移京邑以為營戶慶之又為孝武撫軍中兵叅軍帝以本號為雍州隨府西上時蠻寇太甚水陸梗礙帝停大堤不得進分軍遣慶之掩討大破之降者二萬口帝至而驛道蠻反慶之又

討之王玄謨鎮荊州王方回領臺軍並會平定諸山獲  
七萬餘口鄖山蠻最強盛魯宗之屢討不能克慶之翦  
定之禽三萬餘口慶之還京師會竟陵王誕據廣陵反  
復以慶之為使持節都督南兗徐三州諸軍事車騎大  
將軍開府儀同三司南兗州刺史率衆討之至歐陽誕  
遣客慶之宗人沈道愍齎書說慶之餉以玉環刀慶之遣  
道愍反數以罪惡慶之至城下誕登樓謂之曰沈君白  
首之年何為來慶之曰朝廷以君狂愚不足勞少壯故

使僕來耳帝慮誕北奔使慶之斷其走路慶之移營白土去城十八里夕進新亭誕果出走不得去還城慶之進營洛橋西焚其東門值雨不克慶之兄子僧榮時為兗州刺史鎮瑕丘遣子懷明率數百騎詣受慶之節度慶之塞塹造攻道立行樓土山并諸攻具時夏雨不得攻城帝使御史中丞庾徽之奏免慶之官以激之詔無所問誕餉慶之食提挈者百餘人出自北門慶之不問悉焚之誕於城上授函表倩慶之為送慶之曰我奉詔

討賊不得為汝送表汝必欲歸死朝廷自應開門遣使吾  
為汝送護之每攻城輒身先士卒帝戒之曰卿為統任  
當令處分有方何蒙楯城下身受矢石邪脫有傷挫為  
損不少自四月至於七月乃屠城斬誕其後西陽五水  
蠻復為寇慶之以郡公統諸軍討之攻戰經年皆悉平  
定獲生口數萬人

宗慤為振武將軍元嘉二十三年為蕭景憲軍副隨交  
州刺史檀和之伐林邑圍區粟城林邑遣將范毗沙達

來救區粟和之遣偏軍拒之為賊所敗又遣慤慤乃分軍為數道偃旗潛進討破之拔區粟入象浦遂寇林邑收其異寶雜物不可勝計慤為隨郡太守雍州蠻屢為寇建威將軍沈慶之率慤及柳元景等諸將分道攻之羣蠻大潰又南新郡蠻帥田彥生率部曲反叛焚燒郡城屯據白楊山元景攻之未能下慤率其所領先登衆軍隨之羣蠻繇是畏服

臧質為寧朔將軍元嘉二十七年伐汝南西境刀壁山



蠻大破之獲萬餘口

劉胡為振威將軍元嘉二十八年率步騎三千討上如南山就溪蠻大破之

柳元景元嘉末世祖西鎮襄陽江夏王義恭以元景為將帥即以為廣威將軍隨郡太守既至而蠻斷驛道欲來攻郡郡內兵少糧仗又乏元景設方略得六七百人分五百人屯驛道或曰蠻將逼城不宜分衆元景曰蠻聞郡遣重戍豈悟城內兵少且表裏合攻於計為長會

蠻垂至乃使驛道為備潛出其後戒曰火舉馳進前後俱發蠻眾驚擾投鄖水死者千餘人斬獲數百郡境肅然無復寇抄朱脩之討蠻元景又與之俱後又副沈慶之征鄖山進尅太陽世祖入討元凶以為諮議叅軍領中兵加冠軍將軍太守如故配萬人為前鋒宗慤薛安都等十三軍皆隸焉賊步將魯秀王羅漢劉簡之騎將常伯興等及其士卒皆殊死戰劉簡之先攻西南頻得燒草舫略渡人程天祚若未立亦為所摧王羅漢等攻壘北

門賊艦亦至元景水陸受敵意氣彌彊麾下勇士悉遣  
出戰左右唯留數人宣傳分軍助程天祚還得固砦因  
此破賊元景察賊衰竭乃命開壘鼓譟以奔之賊衆大  
潰投淮死者甚多劬更率餘衆自來攻壘復大破之其  
所殺傷過於前戰劬手斬退者不能禁奔還宮僅以身  
免蕭斌被創簡之收兵而止陣猶未散元景復出薄之  
乃走競投死馬澗澗為之滿斬簡之及軍主姚叔藝王  
江寶朱明智諸葛邈之等水軍主褚湛之軍副劉道存

並來歸順帝至新亭即位以元景為侍中領左衛將軍  
薛安都為寧朔將軍領馬軍與柳元景俱隨孝武入討  
元凶安都至朱雀航橫矛瞋目叱賊將皇甫安民等曰  
賊弑君父何必事之世祖踐祚除右軍將軍率所領騎  
為前鋒直入殿庭賊尚有數百人一時奔散以功封南  
鄉縣男累加左將軍會魯爽反王玄謨拒南郡王義宣  
臧質於梁山安都復領騎為支軍賊有水步營在蕪湖  
安都遣將呂興壽率數十騎襲之賊衆驚亂斬首及赴

水死者甚衆。義宣遣將劉湛及譚攻玄謨。玄謨命衆軍擊之。使安都引騎出賊陣。后其副建武將軍譚金三歷賊陣。乘其隙縱騎突之。諸將繼進。是朝賊馬軍發蕪湖。欲來會戰。望安都騎甚盛。隱山不敢出賊陣。東南猶堅。安都橫擊陷之。賊遂大潰。安都隊主劉元儒於艦中斬湛首。

沈法系為寧朔將軍。領三千人與柳元景宗慤入討元凶。既至新亭。元景居中營。宗慤居西營。法系居東營。據

峒賊攻元景法系臨射之所殺甚衆法系慙外樹悉伐之令倒賊劬來攻緣樹以進彭排多開隙選善射手的射發無不中死者交橫事平以為寧朔將軍始興太守討蕭簡於廣州聞臺軍將至簡誑其衆曰臺軍是賊劬所遣並信之前征北叅軍顧邁被脅從城內善天文云荆江有大兵城內繇此固守初世祖先遣鄧琬圍簡唯治一攻道法系至曰宜四面並攻若守一道何時可拔琬慮功不在已謂法系曰更相申五十日盡又不克乃

從之八道俱攻一日即拔斬蕭簡廣州平封庫藏付鄧琬而還

鄧琬為輔國將軍孝武即位元凶劭黨南海太守蕭簡據廣州反琬討平之

朱脩之孝建初為寧蠻校尉都督雍州刺史時南郡王義宣反令魯秀擊襄陽脩之命斷馬鞍山道秀不得前及義宣敗於梁山單舟南走脩之率衆南追遺寇時竺超民執義宣脩之至乃殺之以功封南昌縣侯

王玄謨為徐州刺史都督諸軍事孝建中南郡王義宣  
與江州刺史臧質反玄謨以輔國將軍豫州刺史與柳  
元景南討軍屯梁山夾岸築偃月壘水陸待之義宣遣  
劉湛就臧質陳軍城南玄謨留老弱守城悉以精兵接  
戰賊遂大潰加都督前將軍封曲江侯

張興世為負外將軍孝建中隨王玄謨出梁山戰有功  
明帝即位進興世號龍驤將軍領水軍拒南賊於赭圻  
築二城於湖目偽龍驤將軍陳慶領舸於前為遊軍興



世率龍驤將軍佼長生董凱之攻克二城因擊慶慶戰  
大敗時投水死者數千人

宋越為江夏王義恭大司馬參軍濟陽太守尋加龍驤  
將軍孝建中臧質魯爽反越率軍據歷陽爽遣將軍鄭  
德玄前據大岷德玄分遣偏師楊胡興劉蜀馬步二千  
進攻歷陽越以步騎五百於城西十餘里拒戰大破之  
斬胡興劉蜀等爽平又率所領進梁山拒質敗走越戰  
功居多大明三年轉長水校尉竟陵王誕據廣陵反越

領馬軍隸沈慶之攻誕遂陷其城

殷孝祖大明初為積射將軍與魏軍戰于青州頻大破之累加龍驤將軍竟陵王誕據廣陵為逆孝祖隸沈慶之攻誕又有戰功

劉劭大明中為西陽王子尚撫軍入直閣先是遣費沈伐陳檀不克乃除劭龍驤將軍西江督護鬱林太守劭既至率軍進討隨以翦定大致名馬并獻珊瑚連理樹後為右將軍太始四年魏遣汝陽司馬趙懷仁步騎五

百寇武津縣勔遣龍驤將軍曲元德輕兵進討魏衆驚散魏子都公闕於拔又率三百人防運車千兩於汝陽臺東水上結營元德單騎直入斬拔首因進攻汝陽臺即陷外壘獲車一千三百乘斬首一百五十級勔又使司徒參軍孫臺瓘督弋陽以西魏軍寇義陽臺瓘大破之魏上其北豫州租有車二千兩勔招羌人徼擊於許昌魏衆奔散焚燒米穀

沈攸之明帝即位初除東海太守未拜會四方反叛南

賊已次近道以攸之為寧朔將軍尋陽太守率軍據虎  
檻時南賊前鋒鍾沖之薛常寶等屯據赭圻殷孝祖攻  
之為流矢所中死攸之推寧朔將軍江方興為統帥大  
破賊於赭圻城外奔至姥山分遣水軍乘勢進討又破  
其水軍拔胡白二城尋假攸之節進號輔國將軍代孝  
祖督前鋒諸軍事薛常寶在赭圻食盡南賊大帥劉胡  
屯濃湖以囊盛米繫流查及船腹陽覆船順風流下以  
餉赭圻攸之疑其有異遣人取船及流查大得囊米攸

之從子懷寶為賊將帥在赭圻遣親人楊公讚齎密書  
招誘攸之攸之斬公讚封懷寶書呈太宗尋尅赭圻遷  
使持節督雍梁南北秦四州郢州之竟陵諸軍事冠軍  
將軍領寧蠻校尉雍州刺史袁顛復率大眾來入鵠尾  
相持既久軍主張興世越鵠尾上據錢溪劉胡自攻之  
攸之率諸將攻濃湖胡遣人傳唱錢溪已平衆並懼攸  
之曰不然若錢溪實敗萬人中應有逃亡得還者必是  
彼戰失利唱空聲以惑衆耳勒軍中不得妄動錢溪信

尋至果大破賊攸之悉以錢溪所送敵軍耳鼻示之顛  
駭懼急追胡還攸之諸軍悉力進攻多所斬獲

吳喜孝武朝授河東太守明帝即位改建武將軍率負  
外散騎侍郎竺超之殿中將軍杜敬真馬步東討先是  
孝武世喜既見驅使嘗充使命性寬厚所至人並懷之  
及東討百姓聞吳河東來便望風降散故喜所至克捷  
遷步兵校尉將軍如故封竟陵縣侯東土定又率所領  
南討遷輔國將軍尋陽太守南賊退走喜遂平定荊州

遷前軍將軍魏尋侵豫州喜統諸軍出討大破之荆亭  
魏長社公遁走戍主帛乞奴歸降事寧復以本位兼左  
衛將軍

黃回為寧朔將軍軍主隸劉劭討于死虎破杜叔寶軍  
除山陽王休祐驃騎行叅軍龍驤將軍攻合肥破之累  
遷至將校以功封葛陽縣男

陸攸之為殿中將軍明帝太始二年永世縣民史逸宗  
據縣為逆攸之討平之

任農夫為司徒叅軍督護會稽太守孔顛等反明帝每遣軍輒多所求須不時上道外監朱幼舉農夫驍果有膽力性又簡率資給甚易乃以千人配之使助東討時庾業兵盛農夫於延陵出長塘雖云千兵至者裁四百未至數十里遣人叅候云賊築城猶未合農夫率廣武將軍高志之永興令徐宗之馳往攻之因其城壘未立農夫親持刀楯赴城入陣大破之庾業棄城走義興先是龍驤將軍阮佃夫募得蜀人數百多壯勇便戰皆著



犀皮鎧執短兵本應就佃夫向晉陵未發會農夫須人分以配之及戰每先登東人並畏憚又恠其形飾殊異舊傳狐獠食人每見之輒奔走農夫收其船仗與高志之進義興援吳喜二月一日喜乃渡水攻郡分兵擊諸壘柵農夫雖至衆力尚少兵勢不敵喜乃與數騎登高東西指麾若招引四面俱進者東軍大駭諸營一時奔散唯龍驤將軍孔叡一柵未拔喜以殺傷者多乃開圍緩之其夜庾業孔叡相率奔走義興平劉延熙投水死

有人告之乃斬尸傳首京邑

陳伯紹為龍驤將軍交州人李長仁據州叛妖賊攻廣州殺刺史羊南伯紹討平之

張瓌為輔國將軍順帝昇明元年吳郡太守劉遐據郡反瓌討斬之

南齊劉懷珍初仕宋為義恭大司馬參軍直閣將軍大明二年虜圍泗口城青州刺史顏師伯請援孝武遣懷珍將步騎數千赴之於麋溝湖與虜戰破七城拜建武

將軍樂陵河間二郡太守賜爵廣晉縣侯累遷羽林監屯  
騎校尉建安王休仁濃湖與賊相持久未決明帝召懷  
珍領軍向青山助擊劉胡事平除游擊將軍累加左將  
軍沈攸之圍郢城懷珍遣建寧太守張謨游擊將軍裴  
仲穆統蠻漢軍萬人步出西陽破賊前鋒公孫方平軍  
數千人收其器甲進平南將軍增督南豫北徐二州增  
邑千戶

李安民初仕宋為殿中將軍晉安王子勛反明帝除安

民武衛將軍領水軍擊赭圻湖白荻浦獺窟皆捷除積  
射將軍軍主張興世據錢溪糧盡為賊所逼安民率舟  
乘數百越五城送米與興世偽軍主沈仲王張引軍自  
績口欲斷江安民進軍合戰破之又擊鵲尾江城皆有  
功封邵武縣子寧朔將軍宄從僕射戍泗口領舟軍緣  
淮游防至壽春魏遣長社公連營十餘里寇汝陰豫州  
刺史劉劭擊退之魏荆亭戍主昇乞奴棄城歸降安民  
率水軍攻破荆亭絕其津逕累加左將軍給事中建平

王景素作難冠軍黃回游擊將軍高道慶輔國將軍曹欣之等皆密遣致誠而游擊將軍高道慶領衆出討太祖慮其有變使安民及南豫州刺史段佛榮行以防之安民至京口破景素軍於葛橋景素誅留安民行南徐州事建元初加領軍將軍鎮壽春先是宋世亡命王元初聚黨六合山僭號州郡討之不能擒積十餘年安民遣軍偵候生擒元初斬建康市加散騎常侍三年引水步軍入清泗於淮陽與魏軍戰破之

王敬則宋泰始初為龍驤將軍軍主隨寧朔將軍劉懷  
珍征壽春殷琰遣將劉從築四壘於死虎懷珍遣敬則  
以千人繞後直出橫塘賊衆驚退除奉朝請元徽二年  
隨太祖拒桂陽賊於新亭敬則與羽林監陳顯達寧朔  
將軍高道慶乘舸船於江中迎戰大破賊水軍焚其舟  
艦事寧帶南泰山太守右俠毅主

周山圖宋太始初為殿中將軍四方反叛僕射王彧使  
山圖領百舸為前驅山圖與軍主佺長生等攻破賊湖

白赭圻二城加振武將軍領兵濃湖追賊至西陽明帝  
賞之賜苑西宅一區五年為龍驤將軍領兵守歷陽鎮  
城初臨海亡命田流自號東海王逃竄會稽鄞縣邊海  
山谷中立屯營分布要害官軍不能討明帝遣直后聞  
人襲說降之授流龍驤將軍流受命將黨與出行達海  
鹽放兵大掠而反是冬殺鄞令耿猷東境大震六年勅  
山圖將兵東屯浹口廣設購募流為其副暨擊所殺別  
帥杜連梅維生各擁眾自守至明年山圖分兵掩討皆

平之

王廣之泰始初除寧朔軍主隸劉懷珍征殷琰於壽春  
琰將劉從築壘拒守臺軍相守移日琰遣長史杜叔寶  
領五千人運車五百乘援從懷珍遣廣之及軍主辛慶  
祖黃回千道連等要擊於橫塘寶結營拒戰廣之等肉  
薄攻營自晡至日没大敗之殺傷千餘人遂退燒其運  
車從聞之棄壘奔走時合肥城反官軍前後受敵都督  
劉劭召諸軍主會議廣之曰請得將軍所乘馬往平之



勅以馬與廣之廣之去三日攻剋合肥賊仍隨懷珍討  
淮北時明帝遣青州刺史明僧暲北征至三城為沈文  
秀所攻廣之將步騎三千餘人緣海救之俱引退廣之  
又進軍襲文秀所置長廣太守劉桃根桃根棄城走軍  
還封安蠻縣子三百戶

呂安國宋泰始二年以建威將軍為劉劭軍副征殷琰  
於壽春衆軍擊破琰長史杜叔寶軍於橫塘安國抄斷  
賊糧道燒其運車多所傷殺琰衆奔走勅遣安國追之

先至壽春琰閉門自守安國與輔國將軍垣閎屯據城南於是衆軍繼至安國勲第一封彭澤縣男

全景文宋泰始二年以假節寧朔將軍宄從僕射軍主隨前將軍劉亮討破東賊於晉陵假輔國將軍北討薛索兒於破釜領水軍斷賊運仍隨太祖於葛冢石梁再戰皆有功

姚道和宋末為游擊將軍隨太祖新亭破桂陽賊有功為撫軍司馬

陳顯達宋末為羽林監隸太祖討桂陽賊於杜姥宅大破之後為鎮西將軍都督益寧二州軍事益部山險多不賓服大度村獠前後刺史不能制顯達分部將吏聲將出獵夜往襲之男女無少長皆斬山夷震服累遷侍中護軍將軍永明五年荒人桓天生自稱玄宗族與雍司二州界蠻虜相扇動據南陽故城世祖遣顯達假節率征虜將軍戴僧靜等水軍向宛葉雍司衆軍受顯達節度天生率虜萬餘人攻舞陰舞陰戍主輔國將軍殷

公愍擊殺其副張麒麟天生被創退走仍以顯達為使  
持節散騎常侍都督雍梁南北秦郢州之竟陵司州之  
隨郡諸軍事鎮北將軍領寧蠻校尉雍州刺史顯達進據  
舞陽城遣僧靜等先進與天生及虜再戰大敗之官軍  
還數月天生復出攻舞陰殷公愍破之天生還竄荒中  
遂城平民曰土三城稍稍降散

焦度宋末為武陵王贇前軍叅軍沈攸之事起太祖遣  
使假度輔國將軍屯騎校尉攸之大衆至夏口將直下

都留偏兵守郢城而已度於城樓上肆言罵辱攸之至  
自發露形體穢辱之故攸之怒改計攻城度親力戰攸  
之衆蒙楯將登度令投以穢器賊衆不能冒至今呼此  
樓為焦度樓事寧度功居多轉後軍將軍封東昌縣子  
崔慧景建元初為都督梁南北秦沙四州軍事初梁州  
賊李烏奴屢為官軍所破走氐中乘間出擾動梁漢據  
關城遣使詣荊州請降豫章王不許遣中兵叅軍王圖  
南率益州軍從劔閣掩討大摧破之烏奴還保武興慧

景發漢中兵衆進頓白馬遣支軍與圖南腹背攻擊烏  
奴大敗遂奔於武興

周盤龍為右將軍建元二年魏軍寇壽春以盤龍為軍  
主假節助豫州刺史垣崇祖決水漂潰盤龍率輔國將  
軍張倪馬步軍於西澤中奮擊殺傷數萬人獲牛馬輜  
重

垣崇祖建元中為都督平西將軍戍下蔡魏軍攻之崇  
祖自率衆渡淮與戰大破之追奔數十里殺獲千計

戴僧靜為太子右率永明五年隸護軍陳顯達討荒賊桓天生於比陽僧靜與平西司馬韓孟度華山太守康元隆前進未至比陽四十里頓深橋天生引虜步騎十萬奄至僧靜合戰大破之殺獲萬計天生退還比陽僧靜進圍之天生軍出城外僧靜又擊破之天生閉門不復出僧靜力疲乃退除征虜將軍南中郎司馬淮南太守

曹虎為游擊將軍永明六年四月羌賊桓天生復引魏

軍出據隔城遣虎督數軍討之虎令輔國將軍朱公恩領騎百匹前行踰伏值魏遊軍因合戰破之遂進至隔城魏軍拒守虎引兵圍柵絕其走路須臾候騎還報魏援已至尋而天生率馬步萬餘人迎戰虎奮擊大敗之獲二千餘人明日遂攻隔城拔之斬魏虎威將軍襄城太守帛烏祝復殺二千餘人賊棄平氏城退走

王茂為寧朔將軍江夏內史建武初魏軍圍司州茂以郢州之師救梁高祖率衆先登賢首山魏將王肅劉昶



來戰茂從高祖拒之大破肅等魏軍退茂還郢仍遷朝  
國長史襄陽太守

張冲為征虜將軍建武二年魏軍攻淮泗假冲節都督  
青冀二州北討諸軍事魏并兵攻司州徐青詔出軍  
分其兵勢冲遣軍主桑係祖繇渣口攻拔魏軍建陵驛  
馬厚丘三城多所殺獲又與青州刺史王洪軌遣軍主  
崔季延襲魏紀城據之冲又遣軍主杜僧護攻拔魏虎  
坑馮時即丘三城驅生口輜重還至溘溝魏救兵至緣

道要擊僧護力戰大破之

蕭坦之為右衛將軍建武二年假節督徐州諸軍事魏軍圍鍾離春斷淮洲坦之擊破之

裴叔業為建武將軍建武二年魏軍圍徐州叔業以軍主隸右衛將軍蕭坦之救援叔業攻虜淮柵外二城尅之賊衆赴水死甚衆以功封武昌縣伯永泰元年以豫州刺史詔領東海太守孫令終新昌太守劉思効馬頭太守僧諸侯等五萬圍渦陽魏南兗州所鎮去彭城百

二十里兗州刺史孟表固守拒戰叔業攻圍之積所斬級高五丈以示城內又遣軍主蕭瓚成寶真分攻龍亢戍即魏馬頭郡也魏人閉城自守徐州刺史廣陵王率二萬人騎五千匹至龍亢瓚等拒戰不敵叔業率三萬餘人助之數道攻魏魏軍新至未立於是大敗廣陵王與數十騎走官軍追獲其節魏又遣將劉藻高思繼至叔業率軍迎擊破之再戰斬首萬級生口三千人罷仗驢馬絹布千萬計



冊府元龜卷三百五十一

欽定四庫全書

冊府元龜卷三百五十二 宋 王欽若等 撰

將帥部

立功第五

梁馬仙琕初仕齊永元中蕭遙光崔惠景亂累有戰功  
以勲至前將軍累遷振威將軍豫州刺史時朐山民殺  
瑯邪太守劉昕以城降魏詔假仙琕節討之魏徐州刺  
史盧昶以衆十餘萬赴焉仙琕與戰累破之昶遁走仙

理縱兵乘之魏衆免者十二收其兵糧牛馬器械不可勝數振旅還京師遷太子左衛率進爵為侯增邑六百戶

曹景宗仕齊為游擊將軍建武四年太尉陳顯達督衆軍北圍馬圈景宗從之以甲士二千設伏破魏援中山王英四萬人遂剋馬圈高祖即位以為右衛將軍天監五年魏中山王英攻鍾離圍徐州刺史昌義之高祖遣景宗督衆軍援義之豫州刺史韋叡亦援馬而受景宗

節度既進頓邵陽洲立壘與魏城相去百餘步魏連戰不能却殺傷者十二三自是魏軍不能逼景宗等噐甲精新軍儀甚盛魏人望之奪氣先是高祖詔景宗等逆裝高艦使與魏橋等為火攻計令景宗與獻各攻一橋獻攻其南景宗攻其北六年三月春水生淮水暴漲六七尺獻遣所督將馮道根李文釗裴邃韋寂等乘艦登岸擊魏洲上軍盡殪景宗因使衆軍皆噪亂登諸城呼聲震天地魏將楊大眼於西岸燒營奔魏中山王英自東



岸棄城走諸壘相次土崩悉棄其器甲爭投水死淮水  
為之不流景宗令軍主馬廣躡大眼至澱水上四十餘  
里伏屍相枕義之出逐英至雒口英以匹馬入梁城緣淮  
百餘里屍骸枕籍生擒五萬餘人收其軍糧器械積如  
山牛馬驢騾不可勝計景宗乃搜軍所得生口萬餘人  
馬千匹遣獻捷高祖詔還本軍景宗振旅凱入增封四  
百并前為二千戶進爵為公詔拜侍中領軍將軍給鼓  
吹一部

蔡道恭齊末為輔國將軍高祖舉義師於雍州道恭以  
舊將遷右衛將軍會巴西太守魯休烈等自巴蜀連兵  
寇上明以道恭持節督西討諸軍事次土臺與賊合戰  
道恭潛以奇兵出其後一戰大破之休烈等降於軍門  
昌義之天監元年以北徐州刺史鎮鍾離四年大舉北  
侵臨川王宏督衆軍向雒口義之為前軍攻魏梁城戍  
剋之五年冬武帝以征役久詔班師魏中山王元英乘  
勢追躡攻沒馬頭等城城內糧貯魏悉移歸北議者咸

謂無復南向帝曰此必進兵非其實也乃遣修鍾離城  
勅義之為戰守備是冬英果率衆數十萬圍鍾離衝車  
毀西墉時城中衆纔三千義之督帥隨方抗禦前後殺  
傷萬計魏軍死者與城平六年帝遣曹景宗韋叡率衆  
二十萬救焉大破魏軍義之率輕兵追至洛口而還以  
功進號軍師將軍

馮道根天監二年以南梁太守領阜陵城戍魏將党法  
宗傅豎眼率衆二萬奄至城下道根塹壘未固城中衆

少莫不失色道根命開城門緩服登城選精銳二百人  
出與魏軍戰敗之魏軍因退遷輔國將軍六年魏攻鍾  
離武帝詔豫州刺史韋叡救之道根為叡前驅至徐州  
建計據邵陽等壘掘塹逼魏城道根能走馬計地計馬  
足以賦功城隍立辨及淮水長道根乘戰艦斷魏連橋  
魏軍敗績進爵為伯改封豫寧縣

韋叡天監四年以輔國將軍督衆軍北伐叡遣長史王  
超宗梁郡太守馮道根攻魏小峴城拔之遂進討合肥

乃堰肥水以灌之城遂潰俘獲萬餘級牛馬萬數絹滿十間屋遷豫州於合肥五年魏中山王元英寇北徐州圍刺史昌義之於鍾離衆號百萬連城四十餘高祖遣征北將軍曹景宗都督衆軍二十萬以拒之次邵陽洲築壘相守又詔廠率豫州之衆會馬魏人先於邵陽洲兩岸為兩橋樹柵數百步跨淮通道廠裝大艦使梁郡太守馮道根盧江太守裴邃秦郡太守李文釗等為水軍值淮水暴長廠即遣之鬪艦競發皆臨壘以小舩載草

灌之以膏從而焚其橋風怒火盛烟塵晦冥敢死之士  
拔柵斫橋水又漂疾倏忽之間橋柵俱壞而道根等皆  
身自搏戰軍人奮勇呼聲動天地無不一當百魏人大  
潰元英因橋絕脫身遁去魏軍趨水死者十餘萬斬首  
亦如之其餘者釋甲稽顙乞為囚奴又數十萬所獲軍  
實牛馬不可勝紀獻遣報昌義之且怒且喜不暇答語  
但叫曰更生更生高祖遣中書郎周捨勞於淮上獻積  
所獲於軍門捨觀之謂獻曰君此獲復與熊耳山等以

功增封七百戶進爵為侯

裴邃天監五年以右將軍盧江太守征邵陽洲魏人為  
長橋斷淮以濟邃築壘逼橋每戰輒尅於是宐作沒突  
艦會甚雨淮水暴溢邃乘艦徑造橋側魏衆驚潰邃乘  
勝追擊大破之進尅羊石城斬城主元康又破霍丘城  
斬城主甯永仁平小峴攻合肥以功封夷陵縣子累遷  
大匠卿普通二年義州刺史文僧明以州叛入於魏魏  
來援以邃為假節信武將軍督衆軍討焉邃深入魏境

從邊城道出其不意魏所署義州刺史封壽據檀公岷  
邃擊破之邃圍其城壽面縛請降義州平除豫州刺史  
鎮合肥四年進號宣毅將軍是歲大軍北伐以邃督征  
討諸軍事率騎二千先襲壽陽九月壬戌夜至壽陽攻  
其郭斬門而入日戰九合為後軍蔡秀成失道不至邃  
以援絕拔還於是邃復整兵收集士卒令諸將各以服  
色相別邃自為黃袍騎先攻狄兵甓城黎漿等城皆拔  
之屠安城馬頭沙陵等戍明年復破魏新蔡郡略地至



於鄭城汝潁之間所在響應壽陽守將長孫穉河間王元琛率衆五萬出城挑戰遂勒諸將為四甄以待之令直閣將軍李祖憐偽遁以引穉穉等悉衆追四甄競發魏衆大敗斬首萬餘級

劉思天監五年以輔國將軍破魏青州刺史元擊於膠水

李興國天監五年以武勇將軍攻平靜關克之

夏侯夔普通二年以征遠將軍副裴邃討義州平之七

年拜信武將軍持節督司州諸軍事八年勅夔帥壯武  
將軍裴之禮直閣將軍任思祖出義陽道攻平靜穆陵  
陰山三關尅之是時譙州刺史湛僧智圍魏東豫州刺  
史元慶和於廣陵入其郭魏將元顯伯率軍赴援僧智  
逆擊破之夔自武陽會僧智斷魏軍歸路慶和於內築  
柵以自固及夔至遂請降夔讓僧智僧智曰慶和志欲  
降公不願降僧智往必乖其意且僧智所將烏合募人  
不可御之以法公持軍素嚴必無犯令受降納附深得

其宜於是夔乃登城拔魏幟建官軍旗鼓衆莫敢妄動  
慶和束兵以出軍無私焉凡降男女口萬餘人粟六十  
萬斛餘財物稱是元顯聞之夜遁衆軍追之生擒一萬  
餘人斬獲不可勝數詔以僧智領東豫州鎮廣陵夔引  
軍屯安陽夔又遣偏將屠楚城盡俘其衆繇是義陽北  
道遂絕

夏侯亶為中護軍普通六年大舉北伐先遣豫州刺史  
裴邃帥譙州刺史湛僧智歷陽太守胡紹世南譙太守

魚弘晉熙太守張澄並世之驍將自南道伐壽陽城未  
剋而邃卒乃加亶使持節馳驛代邃與魏將河間王元  
琛臨淮王元彧等相拒頻戰剋捷尋有密勅班師合肥  
以休士馬須堰成復進七年夏淮堰水盛壽陽城將沒  
高祖復遣北道將軍元樹帥彭寶孫陳慶等稍進亶帥  
湛僧智魚弘張澄等通清流關將入淮淝魏軍夾淝築  
城出亶軍後亶與僧智還襲破之進攻黎漿貞威將軍  
韋放自北道會焉兩軍既合所向皆降下凡降城五十

二獲男女口七萬五千人米二十萬石

陳慶之為宣猛將軍文德主帥普通七年安西將軍元樹出征壽春除慶之假節總知軍事魏豫州刺史季憲遣其子長鈞西城相拒慶之攻之憲力屈遂降慶之入據其城以功賜爵關中侯大通元年攻魏梁城拔之進屠考城擒魏濟陰王元暉業又隸領軍曹仲宗進據渦陽城魏人犄角作十三城慶之銜枚夜出陷其四壘渦陽城主王緯乞降所餘九城兵甲猶盛乃陳其俘馘

鼓噪而攻遂大奔潰斬獲畧盡渦水咽流降城中男女  
二萬餘口又出為持節都督綠淮諸軍事奮武將軍妖  
賊僧強自稱為帝王豪蔡伯龍起兵應之衆至三萬攻  
陷北徐州濟陰太守楊起文棄城走鍾離太守單希寶  
見害慶之受命討之未決辰斬伯龍僧強傳首京中大  
通二年除都督司西豫三州諸軍事南北司二州  
刺史慶之至鎮遂圍懸瓠破魏潁州刺史婁起揚州  
刺史是玄寶于溱水又破行臺孫騰騰大都督侯進豫

州刺史堯雄梁州刺史司馬恭於楚城大同二年魏遣將侯景率衆七萬寇楚州刺史桓和陷沒景仍進軍淮上貽慶之書使降勅遣湘潭侯退右衛夏侯夔等赴援軍至黎漿慶之已擊破景時大寒雪景棄輜重走慶之收之以歸進號仁威將軍

韋放普通八年以明威將軍逐魏軍至渦陽魏又遣常山王元昭大將李獎乞佛寶費穆等衆五萬來援放率所督將陳度趙伯超等夾擊大破之渦陽城主王緯

以城降放乃登城檢出降口四千四百人器仗克初又  
遣降人三十報李獎費穆等魏人棄諸營壘一時奔潰  
衆乘之斬獲畧盡擒穆弟超并王緯送於京師

郭祖深普通中為雲騎將軍所領皆精兵令行禁止每  
討逐越境追擒江中嘗有賊祖深自率討之列陣未敢  
進每令所親人先登不時進斬之遂大破賊威振遠近  
長江肅清

蘭欽大通元年以直閣將軍攻魏蕭城拔之仍破彭城



別將郊仲進攻擬山城破其大都督劉屬衆二十萬進  
攻龍城獲馬千餘匹又破其大將柴集及襄城太守高  
宣別將落思念鄭承宗等仍攻厥固張龍子城未拔魏  
彭城守將楊目遣子孝邕率輕兵來拒欽逆擊走之又  
破譙州刺史劉海游還拔厥固收其家口楊目又遣都  
督范思念別將曹龍牙數萬衆來援欽與戰於陣斬曹  
龍牙傳首京師又假欽節都督衡州三郡兵討桂陽陽  
山始興叛蠻至即平之封安懷縣男又破天漆蠻帥晚

時得會衡州刺史元慶和為桂陽人嚴容所圍遣使告急欽往應援破容羅溪於是長樂諸洞一時平蕩

陰子春太清二年以信威將軍梁秦二州刺史討峽中叛蠻平之徵為左衛將軍又遷侍中屬侯景亂世祖令子春隨領軍將軍王僧辯攻邵陵王於郢州平之又與左衛將軍徐文盛東討侯景至貝磯與景遇子春力戰常寇諸軍

杜崩簡文帝大寶初以宣毅將軍領鎮蠻護軍武陵內

史隨軍王僧辯東討侯景追至石頭與賊相持橫嶺及  
戰景親率精銳左右衝突崩從嶺後橫截之景乃大破  
東奔晉陽崩入據城景平加散騎常侍持節督江州諸  
軍事江州刺史齊將郭元建攻秦州刺史嚴超遠於秦  
郡王僧辯令崩赴援陳霸先亦自歐陽來會與元建大  
戰於土陵霸先令彊弩射元建衆却崩因縱兵擊大破  
之斬首萬餘級生擒千餘人元建收餘衆以遁時世祖  
執王琳於江陵其長史陸納等遂於長沙反世祖徵崩

與王僧辯討之承聖二年及納等戰於車輪大敗陷其二壘納等走保長沙崩等圍之後納等降崩又與王僧辯西討武陵王於破口至即破平之

杜龕大寶初為持節忠武將軍鄖州刺史追侯景至江夏圍其城景將宋子仙棄城遁龕追至楊浦生擒之三年衆軍至姑孰景將侯子鑒逆戰龕與陳霸先王琳等率精銳擊之大敗子鑒遂至於石頭景親率其黨合戰龕與衆軍奮擊大破景景遂東奔承聖二年又與王僧

辯討陸納等於長沙降之又征武陵王於西陵亦平之  
胡僧祐大寶中假節武猛將軍討侯景於京陝僧祐赴  
援至楊浦景遣其將任約率銳卒五千據白塔遙以待  
之僧祐繇別路西上約謂畏已而退急追之及於南安  
芋口呼僧祐曰吳兒何為不早降走何處去僧祐不與  
之言潛引却至赤砂亭會陸法和至乃與并軍擊約大  
破之擒約送與江陵侯景聞之遂遁世祖以僧祐為侍  
中領軍將軍

裴之橫大寶中以河南內史隨王僧辯距侯景於巴陵  
景退遷持節平北將軍東徐州刺史中護軍封預寧侯  
邑三千戶又隨僧辯追景平郢曾江晉等州常為前鋒  
陷陣仍至石頭破景景東奔僧辯令之橫與杜崩入守  
臺城及陸納據湖州叛又隸王僧辯南討焉於陣斬納  
將李賢明遂平之又破武陵王於硤口還除吳興太守  
陳侯瑱仕梁為武臣將軍南充州刺史隨都督王僧辯  
討侯景常為前鋒每戰却敵既復臺城景奔吳郡僧辯

使瑱率兵追之與景戰於吳松江大敗景盡獲其軍進  
兵錢塘景將謝答仁呂子榮等皆降以功除南豫州刺  
史鎮于姑孰承聖二年北齊遣郭元建出自濡須僧辯  
遣瑱領甲士三千築壘於東關以扞之大敗元建除使  
持節鎮北將軍給鼓吹一部增邑二千戶累加太尉天  
嘉元年二月敗王琳于梁山又敗齊兵于博望生擒齊  
將劉伯球盡收其資儲舟艦俘馘以萬計琳及其主蕭  
莊奔於齊

徐世譜仕梁以散騎常侍領水軍從司徒陸法和討侯景與景戰於赤亭湖時景軍甚盛世譜乃別造樓船拍艦火舫水車以益勢將戰又乘大艦居前大敗景軍生擒景將任約景退走因隨王僧辯攻郢州世譜復乘大艦臨其倉門賊將宋子仙據城降以功除使持節信武將軍信州刺史封魚復縣侯邑五百戶隨王僧辯東下常為前鋒又破景將侯子鑒於湖熟景卒後以功除通直散騎常侍衡州刺史資鎮河東太守增邑并前一千



戶

孫瑒仕梁為戎昭將軍宜都太守從王僧辯救徐文盛於武昌會郢州陷乃留軍鎮巴陵修戰守之備俄而侯景兵至日夜攻圍瑒督所部兵悉力拒戰賊衆奔退瑒從大軍沿流而下及尅姑孰瑒力戰有功除負外散騎常侍封富縣侯邑一千戶遷平南府司馬破黃洞蠻賊有功除廣州刺史

歐陽頎仕梁為臨賀內史湘衡之界五十餘洞不賓勅

令衡州刺史韋粲討之粲委顧為都督悉皆平殄高祖  
之討蔡路養李遷仕顧率兵度嶺以助高祖及路養等  
平有功為雲麾將軍東衡州刺史

程靈洗任梁為信武將軍蘭陵太守助防京口及平徐  
嗣徽靈洗有功除南丹陽太守封遂安縣侯增邑并前一  
千五百戶仍鎮采石會王琳前軍東下靈洗於南陵破  
之虜其兵士并獲青龍十餘乘以功授使持節都督南  
豫州緣江諸軍事信武將軍南豫州刺史侯瑱等敗王

琳于柵口靈洗乘勝逐北據有魯山徵為衛士將軍餘如故天嘉四年周迪重寇臨川以靈洗為都督自鄱陽別道擊之迪又走山谷間五年遷中護軍常侍如故

淳于量仕梁為都督巴州諸軍事侯景西上攻巴州元帝使都督王僧辯入據江陵量與僧辯併力拒景大敗景軍擒其將任約進攻郢州獲宋子仙仍隨僧辯剋平侯景承聖元年以功授左衛將軍光大中湘州刺史華皎構逆以量為征南大將軍西討大都督總率大艦自

郢州樊浦拒之皎平并降周將長胡公拓拔定等以功授侍中中軍開府儀同三司

周焯仕梁為持節高州刺史討侯景是時焯據武昌西陽二郡招聚卒徒甲兵甚盛景將任約來據樊山焯與寧州長史徐文盛擊約斬其部將叱羅子通趙迦婁等乘勝追之頻尅約衆殆盡大建元年遷龍驤將軍隨都督吳明徹北討所向尅捷一月之中獲十二城

裴忌仕梁為豫章王法曹參軍侯景之亂忌招集勇力

隨高祖征討累功為寧遠將軍及高祖誅王僧辯弟僧智舉兵據吳郡高祖遣黃佗率衆攻之僧智出兵於西昌門拒戰佗與相持不能尅高祖謂忌曰三吳輿壤舊稱饒沃雖凶荒之餘猶為殷盛而賊徒扇聚天下搖心非公無以定之宜善思其策忌乃勒部下精兵輕行倍道自錢塘直趣吳郡夜至城下鼓噪薄之僧智疑大軍至輕舟奔杜龕忌入據其郡高祖嘉之表受吳郡太守天嘉初出為南康內史時義安太守張紹賓據郡後文

帝以忌為持節都督嶺北諸軍事率眾討平之

周寶安梁平西將軍文育之子文育為熊曇朗所害寶安以吳興太守起為猛烈將軍領其舊兵及平王琳頗有功周迪之破熊曇朗寶安南入窮其餘燼天嘉二年重除雄信將軍吳興太守襲封壽昌縣公

荀朗仕梁為豫州刺史王僧辯東討朗遣其將范寶勝及弟曉領兵二千助之侯景平後又別破齊將郭元運于踟躕山承聖二年率部曲萬餘家濟江入宣城郡界

立頓元帝授朗持節通直散騎常侍安南將軍都督南  
兖州諸軍事南兖州刺史未行而荊州陷高祖入輔齊  
遣蕭軌東方老等來寇據石頭城朗自宣城來赴因與  
侯安都等大破齊軍

樊猛仕梁為威戎將軍安南侯蕭方矩湘州司馬會武  
陵王蕭紀舉兵自漢江東下方矩遣猛率湘郢之卒隨  
都督陸法和進軍以拒之紀已下樓船戰艦據巴江爭  
峽口尋相持久之不能決法和揣紀師老卒惰因令猛

率驍勇三千輕舸百餘乘衝流直上出其不意鼓譟薄之紀衆倉卒驚駭不及整列皆棄艦登岸赴水死以千數時紀心膂數百人猶在左右猛將部曲三千餘人蒙楯橫戈直登舟矚目大呼紀侍衛皆披靡相枕藉不敢動猛手擒紀父子三人斬於艙中盡收其船艦器械以功授游騎將軍封安山縣伯邑一千戶仍進軍撫定梁益蜀境悉平大建初遷武毅將軍領長沙內史尋隸章昭達西討江陵潛軍入峽焚周船艦以功封富川縣侯



蕭摩訶梁末隨侯安都東西征伐戰勝攻取摩訶功實  
居多天嘉中以平劉黑歐陽紇之功累遷巴山太守大  
建五年衆軍北討摩訶隨都督吳明徹濟江攻秦郡齊  
大將軍尉破胡等率衆十萬來援其前隊有蒼頭犀角  
大力之號十餘人出戰摩訶斬之於是齊軍退走以功  
授明毅將軍封廣平縣伯尋進爵為侯七年又隨明徹  
進圍宿豫擊走齊將王康德以功除晉熙太守

周敷梁末為信武將軍寧州刺史永定初王琳據有上

流余孝頃與琳黨李希欽等共圍周迪迪擒孝頃等數  
功居多熊曇朗之殺周文育據豫章將兵萬餘人襲  
敷徑至城敷與戰大破之追奔五十餘里曇朗單馬獲  
免盡收其軍實曇朗走巴山郡收合餘黨敷因與周迪  
黃法氈等進兵圍曇朗屠之加平西將軍豫章太守

章昭達梁末從文帝討杜龕龕平又從討張彪于會稽  
尅之累功除明威將軍天嘉元年隨侯安都等拒王琳  
於沌口戰於蕪湖昭達乘平虜大艦中流而進先鋒發

拍中於賊艦琳平昭達冊勲第一二年除都督郢巴武  
沅等州諸軍事郢州刺史進號平西將軍會周迪反於  
臨川詔令昭達便道征之及迪敗走徵為護軍四年陳  
寶應納周迪復共寇臨川又以昭達為都督既至東興  
嶺而迪又退走昭達乃踰嶺以討寶應寶應據建安晉  
安二郡之界水陸為柵以拒官軍昭達與戰不利因據  
其上流會世祖遣余孝頃出自海道適至因并力乘之  
寶應大潰遂尅定閩中以功授鎮前將軍開府儀同三

司歐陽紇據有嶺南反詔昭達都督衆軍討之擒紇送于京師廣州平以功進車騎大將軍遷司空

周迪為振遠將軍江州刺史高祖即位初王琳東下迪欲自據南川總召所部八郡守宰結盟聲言入赴朝廷恐其為變因厚慰撫之琳至湓城新吳洞主余孝頃舉兵應琳琳以為南川諸郡可傳檄而定乃遣其將李孝欽樊猛等南徵糧餉猛等與余孝頃相合衆且二萬來趨工塘連八城以逼迪迪使周敷率衆頓臨川故郡斷

截江口因出與戰大敗之屠其八城生擒李孝欽樊猛  
余孝頃送於京師收其軍資器械山積虜其人馬

黃法氈永定二年以宣毅將軍率兵援周迪王琳功授  
平南將軍熊曇朗於金口反害周文育法氈共周迪討  
平之進號安南將軍天嘉元年周迪反法氈率兵會都  
督吳明徹討迪於工塘迪平法氈功居多徵為使持節  
散騎常侍都督南徐州諸軍事鎮北大將軍南徐州刺  
史儀同三司太建五年大舉北伐以法氈為都督出歷

陽齊遣其歷陽王步騎五千來援於小岷築城法氈遣  
左衛將軍樊介分兵於大岷禦之大破齊軍盡獲人馬  
器械進攻歷陽城降之以功加侍中

侯安都天嘉元年以司空都督南徐州諸軍事督大軍  
出頓蕪湖以拒王琳琳敗走入齊安都進軍湓城討琳  
餘黨所向皆下會留異擁據東陽安都奉詔東討異與  
第二子忠臣脫身奔晉安安都虜其妻子盡收其人馬  
甲仗振旅而歸以功加侍中征北大將軍增邑并前五

千戶

戴僧朔天嘉元年隨族兄右將軍僧錫平王琳有功僧錫卒僧朔代為南丹陽太守鎮採石從侯安都征留異又從征周迪有功累遷壯節將軍巴州刺史

韓子高天嘉二年以壯武將軍成州刺史文招縣子隨侯安都征留異頓於桃支嶺下時子高兵甲精銳別御一營異平除假節貞毅將軍東陽太守五年章昭達等自臨川征晉安子高自安泉嶺會於建安晉安平以功

遷通直散騎常侍進爵為侯

程文季天嘉二年以貞毅將軍新安太守隨侯安都東討留異異黨與向文政據有新安文季率精甲三百徑往攻之文政遣其兄子璜來拒文季與戰大破璜軍文政乃降四年陳寶應與留異連結又遣兵隨周迪更出臨川文帝遣信義太守余孝頃自海道襲晉安文季為之前軍所向剋捷寶應平文季戰功居多

錢道戢天嘉二年為臨海太守鎮南巖時侯安都之討



留異也道戢帥軍出松陽以斷其後異平以功拜持節  
通直散騎常侍輕車將軍都督東西二衡州諸軍事衡  
州刺史領始興內史宣帝即位徵歐陽紇入朝紇疑懼  
乃舉兵來攻衡州道戢與戰却之及都督章昭達率兵  
討紇以道戢為步軍都督繇間道斷紇之後紇平除左  
衛將軍太建二年又隨昭達征蕭巋於江陵道戢別督  
衆軍與陸子隆焚青泥舟艦仍為昭達前軍攻安蜀城  
降之以功加散騎常侍仁武將軍增邑并前九百戶其

年遷仁威將軍吳興太守未行改授使持節都督郢巴武三州諸軍事郢州刺史王師北討道戢與儀同黃法氈圍歷陽歷陽城平因以道戢鎮之以功加雲麾將軍增邑并前五千一百戶

華皎天嘉三年以仁武將軍新州刺史督尋陽等五郡諸軍事周迪謀反遣其兄子伏甲於船中偽稱賈人欲於湓城襲皎未發事覺皎遣人逆擊之盡獲其船仗其年皎隨都督吳明徹征迪迪平以功授散騎常侍平南

將軍臨川太守進爵為侯

魯廣達天嘉三年以信武將軍北新蔡太守隨吳明徹討周迪於臨川每戰功最仍代兄悉達為吳州刺史封中宿縣侯後為巴州刺史太建五年衆軍北伐畧淮南舊地廣達與齊軍會於大峴大破之斬其數城主張元範虜獲不可勝數進尅北徐州及授都督北徐州諸軍事徐州刺史

吳明徹光大中為丹陽尹會湘州刺史華皎陰有異志

詔授明徹使持節散騎常侍都督湘桂武三州諸軍事  
與征南大將軍淳于量等率兵討皎皎平授開府儀同  
三司太建五年詔加侍中都督征討諸軍事總統衆軍  
十餘萬發自京師緣江城鎮相續降款軍至秦郡尅其  
水柵齊遣大將尉破胡將兵為援明徹破走之斬獲不  
可勝計秦郡乃降進克仁州授征北大將軍進爵南平  
郡公次平峽石岸二城進逼壽陽齊遣王琳將兵拒守  
琳至與刺史王貴顯保其外郭明徹以琳初入衆心未

附乘夜攻之中宵而潰齊兵退據相國城及金城明徹  
令軍中益脩攻具又引肥水以灌城城中苦濕多腹疾  
手足皆腫死者十六七會齊遣大將軍皮景和率兵數  
十萬來援去壽春三十里頓軍不進諸將咸曰堅城未  
拔大援在近不審明公計將安出明徹曰兵貴在速而  
彼結營不進自挫其鋒吾知其不敢戰明矣於是躬擐  
甲胄四面疾攻城中震恐一鼓而克生擒王琳王  
貴顯扶風王可朱渾孝裕尚書盧潛左丞李駒駮送京

師景和惶懼遁走進收其駝馬輜重七年進攻彭城軍至呂梁齊遣援兵前後至者數萬明徹又大破之

任忠太建初以明毅將軍隋章昭達討歐陽紇於廣州累加右軍將軍五年衆軍北伐忠將兵出西道擊走齊歷陽王高景安於大岷逐北至東關仍尅其東西二城進軍蘄譙并拔之徑襲合肥入其郛進尅霍州以功授負外散騎常侍封安復縣侯邑五百戶十二年為平南將軍南豫州刺史仍率步騎趣歷陽周遣王延貴率衆為援

忠大破之生擒延貴

樊毅為左衛將軍太建五年衆軍北伐毅率衆攻廣陵  
楚子城拔之擊走齊軍於潁口齊援滄陵又破之七年  
進尅潼州下邳高柵等六城

徐敬成太建五年以貞威將軍吳興太守隨都督吳明  
徹北討出秦郡別遣敬成為都督乘金翅自歐陽引埭  
上沂江繇廣陵齊人皆城守弗敢出自繁梁湖下淮圍  
淮陰城仍監北兗州淮泗義兵相率響應一二日間衆

至數萬尅淮陰山陽鹽城三郡并連口胸山二戍仍進  
攻鬱州尅之以功加通直散騎常侍雲旗將軍

後魏劉庫仁昭成末為南部大人道武未立符堅以庫  
仁為陵江將軍與衛辰分國部衆而統之後辰叛攻庫  
仁庫仁大破之又西征庫狄部大獲畜產其後慕容垂  
圍符丕於鄴又遣將攻堅幽州刺史王永庫仁遣妻兄  
公孫希助永擊破之

劉眷道武初代其兄庫仁攝國事日部大人絜佛叛眷



力不能討乃引苻堅并州刺史張蚝攻佛破之春又破  
賀蘭部于善無又擊蠕蠕別帥胝渥於意親山破之獲  
牛羊數十萬頭

長孫肥登國初與莫題等俱為大將從征劉顯自濡源  
擊莫奚討賀蘭部並有戰功帝征蠕蠕大破之肥降其  
主匹侯跋又從征衛辰及薛于部滅之蠕蠕別主緡紇  
提子曷多汗等率部落棄父西走肥以輕騎追至上郡  
斬之後從征中山拜中領軍將軍駕次晉陽慕容寶并

州刺史遼西王農棄城宵遁肥追之至蒲泉獲其妻子  
帝將圍中山慕容寶棄城奔和龍肥與左將軍李栗三  
千騎追之至范陽不及而還遂破其研城戍俘千餘人  
中山城內人立慕容普鄰為主帝圍之普隣乃出步卒  
千餘人欲伺間犯圍帝命肥挑戰偽退普鄰衆追肥帝  
截其後盡擒斬之時以士馬少糧遂罷中山之圍就穀  
河間慕容賀麟殺普鄰而自立車駕次魯口遣肥帥七  
千騎襲中山入其郛而還賀麟以步騎四千追肥至泚

水肥自魏昌擊之獲鎧騎二百肥中流矢瘡重乃還中山平以功賜爵琅邪公遷衛尉卿改爵盧鄉時中山太守仇儒不樂內徙亡匿趙郡推羣盜趙準為主妄造妖言云燕東傾趙當續欲知其名準水不足準喜而從之自號使持節征西大將軍青冀二州牧鉅鹿公儒為長史聚黨二千餘家據闕城連引丁零殺害長吏扇動常山鉅鹿廣平諸郡遣肥率三千騎討之破準於九門斬仇儒生擒準詔以儒肉食準傳送京師輶之於市夷其族

除肥鎮遠將軍兗州刺史給步騎二萬南徇許昌畧地  
至彭城司馬德宗將劉該遣使詣肥請降貢其方物姚  
平之寇平陽帝遣肥與毗陵王順等六萬騎為前鋒車  
駕次永安平募遣勇將率精騎二百闕軍肥逆擊擒之  
匹馬不返平退保柴壁帝進攻屠之遣肥還鎮兗州肥  
前後征討未嘗敗失南平中原西摧羌寇肥功居多賞  
賜奴婢數百畜物數千

尉古真登國初從征庫莫奚及叱突鄰並有功又從救

賀蘭破衛辰子直力鞬復擊慕容寶於叅合陂又從平  
中原以功賜爵東州侯加建節將軍明元初為鴻飛將  
軍率衆五千鎮大雒城明元西巡古真與奚斤等率前  
軍討越勒部大破之獲馬五萬匹牛羊二十萬頭驅掠  
二萬餘家西還

奚斤登國初與長孫肥等俱統禁兵後從征慕容寶於  
叅合拜越騎校尉車駕還京師博陵渤海章武諸郡羣  
盜並起所在屯聚拒害長吏斤與畧陽公元遵等率山

東諸將討平之又從破高車諸部又破庫狄宥連部徙其別部諸落於塞南又進擊侯莫陳部俘虜獲雜畜十餘萬至大峨谷置戍而還遷都水使者明元西巡詔斤先驅討越勒部於鹿那山大破之宋少帝立其大臣不附國內離阻乃遣斤收其所侵河南地假斤節都督前鋒諸軍事司空公晉兵大將軍行揚州刺史率吳兵將軍公孫表等南征宋虎牢守將毛德祖遣其司馬翟廣將軍姚勇錯竇霸等率五千人據土樓以拒斤斤進擊破

之廣等單馬走免盡殪其衆斤長驅至虎牢軍於汜東  
留表守輜重自率輕兵徇下河南潁川陳郡以南百姓  
無不歸附陳留太守嚴稜以郡降斤遂平兗豫諸郡還  
圍虎牢德祖拒守不下及虎牢潰斤置守宰以撫之大  
武即位進爵宜城王帝征赫連昌遣斤率義兵將軍封  
禮等督四萬五千人襲蒲坂昌守將赫連乙升聞斤將  
至遣使告昌使至統萬見大軍已圍其城還告乙升曰  
昌已敗矣乙升懼棄蒲坂西走斤追敗之乙升遂奔長

安斤入蒲坂收其資器百姓安業昌弟助興先守長安  
乙升至復與助興棄長安西走安定斤又西據長安於  
是秦雍氏羌皆來歸附與赫連定相持累戰破定定聞  
昌敗遂走上邽斤追之至雍不及而還大延初涼州平  
以戰功賜僮隸七千戶

王建登國中以左大夫從征伐諸國破二十餘部又從  
征衛辰破之後為中部大人從破慕容寶於衆合陂遷  
冠軍將軍烏丸庫侖宮鳴聚黨為寇詔建討平之



婁伏連為首帥領部落從道武破賀蘭部又平中山及  
征姚平於柴壁以功賜爵安邑侯

長孫嵩為南部大人累有軍功後從道武征中山除冀  
州刺史賜爵鉅鹿公

劉羅辰為南部大人從道武平中原以功賜爵永安公

奚牧為輔國將軍從道武征慕容寶畧地晉州獲寶丹  
陽王買得及離石護軍高秀和於干陶以軍功拜并州  
刺史賜爵任城公

和跋擢為外朝大人從道武平中原以功進為尚書鎮  
鄴慕容德使兄子和守滑臺和長史李辯殺和求援於  
跋跋率輕騎赴之既至辯悔閉門拒守跋使尚書郎鄧  
暉說之辯乃開門跋入收其府藏德聞之遣將率三千  
騎擊跋跋逆擊大破之擒其將士千餘人而還於是陳  
穎之民多來向化改為定陵公與常山王遵率衆五萬  
討賀蘭部別帥木易干破之出為平原太守

莫題為中山太守督司州之山東七郡事道武征姚興

次於晉陽而上黨羣盜秦頗丁零翟都等聚衆於壺關  
詔題率衆三千以討之上黨太守捕頗斬之都走林慮  
詔題搜山捕討盡平之

李粟初隨道武幸賀蘭部數有戰功拜右將軍帝征慕  
容寶粟督萬騎為前驅軍之所至莫不降下遷左將軍  
庾岳為外朝大人慕容垂圍慕容永於長子永告急求  
援岳與陳留王慶以一萬騎東渡河救於秀容破山胡  
部高車門等徙其部落會永滅乃班師從道武平中原

拜安遠將軍官軍之驚於栢肆也賀蘭部帥附力眷紇突鄰部帥匿物尼紀奚部帥叱奴根等聞之聚黨反於陰館南安公元順討之不尅死者數千人太祖聞之詔岳率萬騎還討叱奴根等殄之百姓乃安離石胡帥呼延鐵西河胡帥張崇等不樂內徙聚黨反叛岳率騎三千討破之斬鐵擒崇搜山窮討散其餘黨以功賜爵西昌公進號征虜將軍又討反人張超清河太守傅世并破平之以岳為鄴行臺

丘堆明元即位以為散騎常侍與叔孫建等討滅山胡  
晉人沂西河上詔堆與建自河內次枋頭以備寇盜姚  
泓既滅堆留鎮并州赫連屈子遣三千騎寇河內堆自  
并州與游擊將軍王雒生擊走之以功賜爵為侯

和突為材官將軍天興五年破黜弗素古延等諸部獲  
馬三千餘匹牛羊三萬餘頭蠕蠕杜峪遣騎救素古延  
等突逆擊破之于山南河曲獲鎧馬二千餘匹

劉託為離石護軍天賜元年率騎一千襲蒲子擒姚興

寧北將軍秦平太守衡譚獲三千餘口

閻大肥明元神瑞中為都將討越勒部於跋那山大破之秦常初復為都將領禁兵討蠕蠕獲其大將莫孤渾宜城王奚斤之攻虎牢也大肥與娥清領十二軍出中道畧地高平金鄉東至太山假大肥使持節安陽公鎮撫陳汝太武初復與奚斤出雲中白道討大檀破之又為都將擊大檀大破之還至渴侯山遂討東部高車於已尼陂又征平涼並有功太武將拜大肥為王遇疾卒

追贈中山王

娥清為黃門侍郎明元南巡幸鄴以清為中領軍將軍與宋丘將軍周畿等渡河畧地至湖陸高平民屯聚林藪拒射官軍清等因誅數千家虜獲萬餘口賜爵須昌侯清與畿等遂鎮枋頭

尉目斤秦常中以前將軍從平虎牢頗有軍功拜中山太守

于栗磾秦常中為黑稍將軍奚斤之征虎牢也栗磾別

率所部攻晉河南太守王洵之於金墉洵之棄城遁走  
遷豫州刺史

叔孫建為正直將軍相州刺史飢胡劉武等聚黨叛明  
元以建督公孫表等討之斬首萬餘級餘衆奔走投汾  
水死水為不流晉師伐姚泓其部將王仲德為前鋒將  
逼滑臺兗州刺史尉建率所部棄城濟河仲德遂入滑  
臺明元聞之詔建渡河耀威斬尉建投其屍於河尋都  
督前鋒諸軍事禁兵將軍與汝陰公長孫道生濟河而



南仲德等自河入濟東走青州宋兗州刺史竺靈秀棄  
須昌南奔湖陸建追擊大破之斬首五千餘級遂至鄒  
魯還屯范城大武以建威名南震除平原鎮大將加征  
南大將軍先是簡幽州以南戍兵集於河上一道討雒  
陽一道攻滑臺宋將檀道濟王仲德救滑臺建與汝陰  
公道生拒擊之建分軍夾戰縱輕騎邀其前後焚燒穀  
草以絕其糧道兵饑叛者相繼繇是安頡等得拔滑臺  
公孫表為功勞將軍元屈叅軍事宋人征姚興兗州刺

史尉建聞寇至棄滑臺北走詔表隨壽光侯叔孫建屯枋頭泰常七年議取河南侵地帝以為掠地至淮滑臺等三城自然面縛表固執宜先攻城帝從之於是以奚斤為都督以表為吳兵將軍廣州刺史斤等濟河表攻滑臺歷時不拔帝乃南巡為之聲援表既克滑臺引師西伐大破宋將翟廣等於王樓遂圍虎牢

冊府元龜卷三百五十二